

DOMINGU VENTICUATRO. Ciclu A.

MONICIÓN PA EMPRINCIPIAR: Lo más grande y lo más buapo que se mos revela na Biblia ye que Dios mos quier gratis, sin que lo merezamos. ¡Queremos porque ye buinu,... y nun pue ser de otra forma!... Nosotros poemos asomeyamos a Él, y el tretu nuistru con los demás pue ser paiciú al que Dios tien con etchos y con nosotros... Hoy dizmos algo que pue estrañamos: ¡por difícil que mos paeza, siempre poemos perdonar!. Y poemos facetcho porque mos da fuerzes el ver que Dios mos perdona a cá retu. ¡Y qué contentos y tchixerinos mos sentimos por eso!... Xesús habíai dicho a Pedru que día ser piedra esquinera de la Ilesia, y que tenía el poer pa atar o desatar, pa perdonar o non; agora dizi muncho más: dizi que sin perdón nu hai Ilesia que valga, porque sin perdón nun hai unión, nin paz, nin hermandá... Na Misa acordámosmos de que Dios mos perdona y mos sigue queriendo como sólo Él sabe querer: dando la so vía por nosotros... Y poemos facer como Él.

ACTU DE ARREPENTIMIINTU: Antes de acercamos al Dios buinu, reconozamos los pecaos nuestros:

-Por creemos buenos, siendo pecaos. Señor, ten piedá.

-Por tener tasaes les veces pa perdonar. Cristu, ten piedá.

-Por nun agracer bastante a Dios que mos perdone, nin alegamos de que lo faga. Señor, ten piedá.

ORACIÓN: Dios nuistru, creaor y emu de toes les coses, amira pa nosotros y fei que te sirvamos con tól corazón, pa que asina poamos sentir lo que val el to amor. Pedímostelo por Xesucristu el Señor nuistru. Amén.

PRIMER TCHETURA: Ponese rabiéu y ser rencorusu son coses mui fees... El Señor va vengase del vengativu... Si tú perdonas, Dios va perdonate tamién.

Tchetura del Tchibru del Eclesiásticu. 27,33-28,.9. "Hai dos coses muy fees, muy fees: son ponese rabiéu y ser rencorusu; y el pecaor tien eses dos coses. El Señor va vengase del que ye vengativu, y va tchevá cuenta estrencha de les sos culpes. Si el prósimu te ofiende, perdónalu, y asina perdonarante a ti cuando lo pidas. ¿Cómo se atreve un home que se tcheva mal con utru, dir a pedí al Señor que lu cure? Nun tien pena de los demás, ¿y quier que i perdonen les culpes? Si él, que ye de carne y buisu, nun se desenoxa, ¿quién va a pedir perdón pa él y pa los sos pecaos? Piensa en to fin y desenfáate; acuérdate de que vas a morrer y de que vas apodrecer na sepultura, y cumple los mandamientos. Acuérdate de los mandamientos y nun te noxes con el prósimu; acuérdate de la alianza del Señor; y perdona les ofenses'" PALABRA DE DIOS.

-¿Qué ye lo que más te choca de la tchetura que acabamos de facer?

-Ye tchetura del Antiguu Testamintu, pero ¿paezte que val pa nosotros hoi? ¿Por qué?

-¿Cuéstanos perdonar? ¿Por qué?

-¿Nun perdonar trai poblema a les families? ¿Y a los pueblos? ¿Cuáles?

-SELMU RESPONSORIAL. 102.

Tós: El Señor ye compasivu y misericordiusu, tarda en enfaase y perdona volao.

-Alma mía, bendiz al Señor, alábalu con toes les tos entrañes. Alma mía, bendiz al Señor, y nun te olvíes de los favores que te fexo.

-Perdónate él tós los pecaos, y cúrate de toes les enfermeaes; él sálvate la vía de la poza y arródiate de bondá y de ternura.

-El Señor ye compasivu y misericordiusu, tarda en enfaase y perdona volao; nun mos trata según los nuestros pecaos, nin mos paga tó lo que merecen los nuestros culpes.

-Arrefundia les nuestros culpes tan tchuiñe de nosotros a como lo ta el sitiü per onde sal el sol de onde se escuende. Como un padre quier a los sos fijos, asina quier Dios a los que lu respetan.

SEGUNDA TCHETURA: Ningún de nosotros vive pa sí. En vía y en muerte, semos del Señor, que morrá pa ser Señor de vivos y muertos.

De la Carta de san Pablu a los Romanos. 14,7-9. "Hermanos: Naide vive pa sí, y naide muere pa sí. Si vivimos, vivimos pal Señor, y si morremos, morremos pal Señor. En vía y en muerte semos del Señor; porque pa eso foi pa lo que morrú Cristu y resucitó, pa ser Señor de los vivos y de los muertos". PALABRA DE DIOS.

-¿Qué te paez eso de que 'naide vive pa sí'?

-Nun sé quién, dixo que un simple alíu de una mariposa tien que ver con lo que pase nel mundu. ¿La vía nuestra será importante pa otros? ¿Pa quién? ¿Será importante pal mundu entiru?

-¿Y la muerte nuestra será importante? ¿Val pa algo el dir gastándose poco a poco, hasta morrer? ¿Valdrá pa otros?

-¿Cómo entiendes eso de: 'si vivimos, vivimos pal Señor; si morremos, morremos pal Señor'? ¿La tchegá del Reinu de Dios -amor, xusticia, paz- tien que ver con esto?

EVANXELIU: Si el mio hermenu me ofiende, ¿cuántes veces lu tengo que perdonar? ¿Hasta siete...?

Tchetura del sentu Evanxeliu según san Matéu. 18,21-35. "Naquel entós, acercose Pedru a Xesús y preguntó: «Si el mio hermenu me ofiende, ¿cuántes veces lu tengo que perdonar? ¿Hasta siete?» Xesús contestó: «Nun ye hasta siete veces, ye hasta setenta veces siete. Por eso ye que'l Reinu de los cielos asomáyase a un señor que se puenxo a axustayos les cuentas a los empleaos. Ná más empezar, trixéroni a ún que i debía diez mil talentos. Como nun tenía con qué pagái, el señor mandó que lu vendieran como esclavu a él, a la muyer y a los fíyos, y tó lo que tenía, pa ver si asina pagaba lo que i debía. El empleáu echose a los pies del señor, y pidíu por favor: 'Ten paciencia pa conmigo, y pagarételo tó'. Al señor dió pena, dexolu tchibre y hasta perdonó la deuda. Pero el empleáu aquel, en cuantes salú de onde el señor, atopose con un compañiru que i debía cien denarios, y echó mano al gañote hasta que casi lu afogaba, gritándoi: '¡Págame lo que me debes!' El compañiru echósei a los pies, y pidíu por favor: 'Ten paciencia pa conmigo, y pagarételo tó.' Pero el utru nu i fexo kesu. Al revés, metulu prisu hasta que i pagara tó lo que i debía. A los compañeros, que vieron lo que pasó, nun yos gustó ná lo que fexo, y fueron aonde el emu a contailo tó. Entós el emu mandolu a tchamar y dixoi: '¡Yes un descastéu y nun tienes entrañes! Perdonete tó lo que me debías, porque me lo pediste. ¿Nun debía habete dao pena del to compañiru, ibual que yo la tuve de tí?' Y enfaose tanto el emu aquel, que lu puenxo en manes de la xusticia hasta que i pagara tó lo que i debía. Ibual va facer con vosotros el mio Padre del ciilu si nun perdonáis de corazón a los hermanos.»" PALABRA DEL SEÑOR.

Lo que mos ofiendan a nosotros los compañeros, nun ye ná encomparao con lo que i ofendemos a Dios. Y mientras Dios mos lo perdona tó, nosotros nin siquiera esperamos un ratín. Dios nin siquiera se acuerda de los sos derechos, y hasta paez que nun los tien; porque ye'l Padre buinu. Pero nosotros sí queremos que se reconozan los nuestros y asomeyámosmos al empleáu que nun tenía entrañes... La comparanza esta que pon Xesús nun se refier a los poblems personales que poamos tener... El mundu tien menester, más que de niúna otra cosa, del perdón. Por eso, los que quieren un mundu más xustu, nun puen tchegar a él pel camín del insultu y del rencor, como tamos avezaos a ver que faen los políticos; nun se pue tener un mundu xustu si nu hai perdón... Esta parábola ayúamos a entender aquetcho que diz la Biblia: 'Dexaime a mí la venganza, diz el Señor: pagaré a caún asegún lo que haya fecho.'... Dios nun va cobrar por los derechos que Él tien; nun va cobrar más que por los derechos de los probes, que nun puen pagar porque yos lo quitaron tó... Y va cobrar tamién por los que tan arrepentíos de les sos faltas, pero nun los perdonaron... La Ilesia nun ye tan santa como tenía que ser; pero sí ye'l sitiu onde se apriende que Dios ye misericordiusu, y onde los homes aprienden a perdonar.

-¿Por qué preguntaría Pedru eso de cuántes veces hai que perdonar? ¿Abundan les ofenses? ¿Por qué se enfaa la xente?

-¿Qué pasa na familia, na comuniá, na Ilesia, nel mundu entiru cuando les persones se enfaan unes con otres? ¿Y cuando se niegan a perdonar?

-¿Qué te paez lo que contestó Xesús? ¿Pasaríase de la raya? ¿Ye importante perdonar? ¿Por qué?

-Piensa nes persones que salen na parábola (el señor, el empleáu, el compañiru, los otros compañeros). ¿A cuál de los personaxes te paez tú?

-Na parábola, los deudores pedían 'paciencia'. Al señor dioi 'pena' y perdonó la deuda porque tuvo 'compasión', y quéxase del empleáu que nun tuvo 'compasión'. ¿Qué te paez eso de tener 'paciencia, lástima, compasión'?

-¿Qué diferencia hai ente lo que piden los que deben, y lo que da y reclama el señor? ¿Qué quier el que pide 'paciencia'? ¿Qué da el que se dexa tchevar de la 'lástima' y la 'compasión'?

-¿El perdón naz de la paciencia o de la compasión?

-¿Cómo se ve que tenemos compasión a los que mos ofienden? ¿Perdonámoslos?

REFLESIÓN: Óyese muncho decir: 'A mí el que me les fai, me les paga', 'Féxomeles una vez, pero xuro que nun me les fai otra vuelta', 'Va pagámeles toes xuntes', 'Perdono, pero nun olvíó'... Son frases nes que se dexa ver lo que cuesta perdonar. Y eso ye razón pa que la xente nun viva aunía y hermaná. Nu hai que estrañase de que Xesús falara del asuntu a los sos discípulos... Día camín de Xerusalén, y sabía lo que i esperaba. Corría priesa echar a andar el Reinu que'l Padre i había encargao: una comuniá de persones, furniintu de un mundu nuivu onde tós se quixeran... Los que lu seguían tenían a veces discutinios, ente otre coses porque suañaban con ser más unos que otros... Y Matéu escribú el so Evanxeliu pa una comuniá na que amenazaba con romperse la unía y la fraterniá; por eso yos acordó lo que Xesús yos había aprendió... Les tensiones ente la xente vienen de los pecaos: egoísmos, inxusticies, coícies, marxinaciones, violencies, trampes, desprecios... Soles o entremecies, eses coses faen apaicer disconformiaes y resquemores que acaban en divisiones y enemistaes, y en incapacia pa suañar y costruir xuntos un mundu nuivu... Pue ser que Pedru sintiera que ente etchos había tensiones. Y pue ser que tuviera disconforme y estrañeu de que Xesús nun se valiera del so poer pa acabar con los que lu ofendían... La cosa ye que i fexo la pregunta sobre cuántes veces se tien que perdonar. Los xudíos decían que hasta cuatro. Al ver cómo se portaba Xesús, paizúi que poía tchegase hasta siete. Acordábase de que i había mandao ponese detrás d'Él, por eso nun se atrevú a decií que ya taba bien de abuantar a aquetcha xente, que acabara con etchos de una vez... Pero Xesús puenxo una parábola pa esplicar que hai que aprender de Dios que nun pon cota a la so bondá... Na parábola trátase de un rei oriental. Piduyos cuentas a los cargos más altos. Poía ser el asuntu de los impuestos que i tenían que pagar. Ún detchos debíai una milloná, y nun tenía cómo pagái. Según facían naquel entós, condenáronlu a que lu vendieran a él y a tó la so familia hasta que lo pagara tó. El home aquél viuse perdiu, y pidúi al rei que i diera un plezu pa pagái (Mt 18,25). Al rei dioi pena de aquel home, y en ve de dai un plezu, perdonoi tó... El cuintu nu acabó asina. El home ísi al que i habían perdonao una milloná, tenía un compañiru que i debía unos cuartos y yera tamién empleáu del rei. Foi a escontra dél pa que i pagara. El compañiru, como nun tenía con qué, pidúi lo que él i había pedío al rei: un plezu pa poer pagái (Mt 18,29)... Vense bien dos diferencies enormes: na deuda y nel comportamiintu. El rei perdonoi una milloná porque i dio pena de aquel home; pero el utru nin perdona nin tien pena niúna (Mt 18,30)... Al enterase el rei, tchamolu pa echái en cara lo que había fecho y lo sin entrañes que yera... Nun ta malo de saber qué mos quier decir con la parábola. El rei figura a Dios. El so amor misericordiusu perdonó gratis toes les nuestres deudes, y asina convidamos a portamos con los otros a como Él mos trata (Mt 5,48). Notres palabres: el perdón mídese en comparanza con la misericordia de Dios; y la misericordia de Dios ye tan grande que nun se pue medir... Nun se trata de perdonar porque nu hai más remidiu, refunfuñando; ye cosa de perdonar 'de corazón' (Mt 18,35)... Na comuniá de Matéu, los que tenían problemas pa perdonar, sentían que yeran pa etchos les palabres del rei de la parábola: '¿Nun debía date pena del to compañiru, ibual que yo la tuve de ti?' (Mt 18,33)... Tamién son pa nosotros, los discípulos de Xesús de tós los tiempos: tenemos que perdonar porque Dios mos perdona tós los dí; y porque Xesús, al que mos queremos asomeyar, perdonó hasta a los que lu taban matando... La pregunta que Pedru fexo en ve nuestra nun yera la de '¿cuánto tengo que perdonar?'; tenía que haber sío: '¿cuánto pueo perdonar?' Nin mos enteramos de que tenemos a mano les tchaves pa atar y desatar. Perdonar ye una posibilía que tenemos de paicemos al Padre, de facer un mundu distintu y nuivu, de acabar con el círculu envenenáu de 'dasme-doite', 'fixísteme-fágoté'; de salir al sol y al aire, tchibres... Tampoco ye cosa de tchevar cuenta de les veces que perdonemos, o de tener miiu a pasamos de buenos. El perdón nun pue tener cota. El cristienu nun ta metíu nun tchibru de cuentas, ta abiirtu al evanxeliu, al amor, al perdón... Tampoco ye cosa de preguntase qué facer cuando el utru me ofiende. Tamién nosotros podemos ofender. ¿Nun tendrá la otra xente quexes nuestres?... Por más que nes mises reconozamos que semos pecaos, sólo son palabres, nun lo sentimos... Resúltamos a veces más fácil perdonar que pedir

perdón y dexar que mos perdonen. Ye preciso pedir perdón pa aprender a perdonar... Pedru nun aprendú a perdonar hasta que'l Señor nu i perdonó que lu hubiera negao... Que'l Señor mos perdona ye algo mui grande. Nun mos cabe dientro y acanza pa tós... Pa sentise bien de que Dios mos

perdone, hai que dayos el perdón a los demás... Cuando Pedru viu que Dios lu perdonaba una vez y otra, entendú que nu había que preguntar cuántes veces se perdona. Nun lo entendía cuando taba seguru de sí y desconfió de los demás. Pero al dase cuenta de les sos debiliaes volvuse peritu en misericordia y en perdón... Cuando se dio cuenta de les veces que lu perdonaron y de les que lu tendrían que perdonar, entendú que se pue perdonar siempre.

CREO: Digamos bien alto lo que creemos:

-¿Creéis que Dios ye'l Padre de tós?

-¿Creéis que Dios mos quier y mos perdona sin que lo merezamos, por lo buinu que ye?

-¿Creéis que saber que Dios ye asina, ye pa tar contentos?

-¿Creéis que'l perdón ye precisu pa que poamos tar auníos y hermanaos na comuniá que ye la Ilesia?

-¿Creéis que Xesús mos dio a tós el poer de perdonar?

-¿Creéis que'l ciilu ta onde tós se quieren y perdonan?

Ésta ye la nuestra fe: la que mos pon contentos al saber que Dios mos perdona porque mos quier; la que mos fai agracíos; la que pon les bases de un mundu nuivu, onde tós mos queremos y tamos en paz.

ORACIÓN DE LOS FIELES: Pidámosi xuntos a Dios:

-que mos entchenemos de contintu al ver que Dios ye tan buinu con nosotros que mos perdona.

-que aprendamos de Dios a querer y perdonar gratis y que descubramos lo importante y buapo que ye.

-que tchevemos a tós el anunciu que mos trexo Xesús de que Dios ye'l Padre que mos perdona y mos quier siempre.

-que agradezamos que Xesús mos haya dao el poer pa perdonar siempre y a tós.

-que mos dea la tchuz pa dolemos del mal tretu que se da nel mundu a los preferíos de Dios: los probes y sufríos.

-que séamos agracíos con los que mos dan el so perdón.

ORACIÓN: Señor, oye lo que te pedimos y fei que te guste lo que te ofrecen los tos serviores, pa que asina valga pa la salvación de tós lo que caún de nosotros ofrez pa venerar el to nome. Por Cristu el Señor nuistru. Amén.

PREFECIU: Señor, Padre sentu, Dios que lo apués tó y que vives pa siempre, mereces de verdá que te déamos les gracias y ye menester y obligación nuestra facetcho, porque de etcho vienmos la salvación. Hoi dámoste les gracias porque mos fixiste saber que yes buinu y mos perdonas; y porque mos faes capaces de perdonar. Dámoste tamién les gracias por la xente que mos perdona porque ye bona y mos quier. Asina traes al mundu el to Reinu de amor y de unió. Por eso, axuntámosmos a los ánxeles y arcánxeles, y nun mos cansamos de entonar el cantar de la to gloria.

COMUNIÓN: '¡La to misericordia, Señor, nun tien priciu! A la xente prestai ponese a la sombra de les tos ales' (Selmu 35,8).

ORACIÓN: Señor, que la gracia de esta comunión se mos meta bien adientro, nes nuestres entrañes y nel nuistru espíritu, pa que sea la so fuerza la que mos mueve a vivir, y nun lo sean los nuestros sentimientos. Por Xesucristu el Señor nuistru. Amén.

DESPEDÍA: El Dios de Xesús quier a tós porque ye buinu. En comparanza con lo descomunal que ye'l so amor, los méritos nuestros nun son ná... Ibual han de amar los que creen nÉl... El Señor ta siempre dispuistu a componer la so alianza con nosotros (Eclu 28,7); por eso tenemos que tar abiertos a tós... El que ama de verdá, failo gratis, por eso nun tien sentíu preguntar cuánto hai que perdonar... Nun hai relemu más grande que saber que 'el Señor de vivos y muertos' mos quier gratis y sin cota... El poer de perdonar dioilu Dios a tó la Ilesia, y niún cristienu pue furtiase de perdonar. Por eso, ¡nun ye verdá que

haya algo que nun poamos perdonar!... Al dar el perdón, lo que fai la comuniá cristiana ye que'l perdón del Padre que ta nos cielos tchegue al mundu.